

## 《印沙佛文》CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) [cbeta@ccbs.ntu.edu.tw](mailto:cbeta@ccbs.ntu.edu.tw)

資料底本: 大正新脩大正藏經 Vol. 85, No. 2842

### No. 2842

#### 印沙佛文

仰啟蓮花藏界清淨法身。百億如來恒沙化佛。清涼山頂大聖文殊。雞足崑山得道羅漢。龍宮祕典鷲嶺微言。道眼他心一切賢聖。唯願發神足。運悲心。降臨道場。證明功德。厥今置淨壇於八表。敷佛於四門。中央建觀音之場。釋眾轉金言之部。設香饌供三世諸佛。散淨食與水陸生靈。合境虔恭傾城懇顙者。為誰施作。時則有我府一太保 瑞福攘災之加會也 伏惟我□太保門傳闕閱。應賢五百之年。岳瀆清生資。當期半千之士。文過周孔雅操。入木而七分。彎弓穿揚舉矢。猿啼而遶樹寬弘治眾。萬姓歎異瑞之風。設法安人。千家賀堯年之慶。加以信珠皎淨心鏡先明。憑釋教以定八方。奉□聖賢而安社稷。先陳志懇。相鷲嶺而傾心。請佛迎僧。結淨壇於九地。六時轉念經聲動曉於合城。士庶誥天。鈴梵洪鳴於滿城。是時也太陽北照。凝凍相容。僧徒念誦以周圓。灌頂精誠已五日總斯多善。無限朦因先用莊嚴。梵釋四王龍天八部。伏願威光轉盛。福力彌增興運慈悲。救人護國。當今聖主永坐皇城。十道爭馳赤心向國。又特是福伏用莊嚴。我太保貴位。伏願福如海岳。永虎節而迎祥。祿極江淮。治河西而代。國太吉慶比日月而漸圓。公主夫人恒昌保芳顏而永潔。刺使尚書等固受願接踵而紹隆。諸小娘子迎長壽貞闌而皎皎。然後河清海晏不聞憂苦之聲。四寢來降永絕烽煙塵之戰。三災彌滅盡九橫於海嶠。勵疫消災。送飢荒於地戶。散霑法界。普及有情類。此勝因城登覺道摩訶般若

夫曠賢大劫有聖人焉。出釋氏宮名薄伽梵。心凝大寂身意無邊。慈化眾生號之為佛。厥今坐前社足等故。以三春上津四□。初分脫塔印沙啟加願者。奉為躬保願功德之福會也。唯公乃金聲夙顯玉譽早聞。列位名班昇榮冕職。遂乃妙回宿殖善芽發於今生。業果先淳道心堅。於此日四大而無注曉。五蘊而皆空脫。千里之真容印恒沙之遍跡。更能焚香。効外諸僧徒於福事之前。散滄遍所於水陸之分。以此印佛功德迴向福因。先用莊嚴梵釋四王龍天八部。伏願威光轉勝福力彌增救人護國。願使聖躬延受五穀豐登。管內人安歌謠滿城。又持勝福伏用莊嚴施主即體。唯願身而玉樹恒淨恒明體。若金剛常堅常固。今世後世莫絕善緣。此世他生善牙增長。然後散霑法界普及有情類。此勝因齊成佛果摩訶般若